



ИНД - 47

Иргэний Нисэхийн Багц Дүрэм

Агаарын хөлгийн бүртгэл болон тэмдэглэгээ

Иргэний Нисэхийн Ерөнхий Газар

ДҮРМИЙН ТАЙЛБАР

ИНД-47 нь, Иргэний нисэхийн тухай хуульд заасны дагуу агаарын хөлгийн бүртгэл, тэмдэглэгээ болон агаарын хөлгийг бүртгэх шаардлагыг тогтооно. Энэ Дүрэмд цагдаагийн таних тэмдэг, онцгой будган зураглал болон агаарын хөлгийн тэмдэглэгээний минимум хэмжээ, шаардлагыг багтаасан.

Энэ Дүрмээр тогтоосон шаардлага нь Олон улсын иргэний нисэхийн тухай конвенцийн Хавсралт 7 (Агаарын хөлгийн үндэсний харъяалал болон бүртгэлийн тэмдэг)–д агуулагдсан шаардлагын дагуу боловсруулагдсан.

Энэ Дүрэм нь Иргэний нисэхийн асуудал эрхэлсэн Засгийн газрын гишүүний баталсан ИНД-47-ийн цахим хувилбар бөгөөд зөвхөн ишлэл хийх зорилгоор хэрэглэнэ. Хүчин төгөлдөр ИНД-47, түүний нэмэлт, өөрчлөлтийн хуулбарыг ИНЕГ-аас, эсхүл www.mcaa.gov.mn веб сайтаас татаж авах боломжтой.

Мэдээлэл

Гишүүн улсуудын иргэний нисэхийн Дүрмийг сайжруулах замаар иргэний нисэхийн салбарт нэгдсэн нэг Дүрмийн зохицуулалтад шилжих Олон улсын иргэний нисэхийн байгууллагын 1992 оны 29-р чуулганы А29-3 тогтоолыг хэрэгжүүлэх зорилгоор, Монгол Улс болон Шинэ Зеланд улсын ИНЕГ-ын хооронд 1999 оны 5 дугаар сарын 6-нд байгуулсан “Техникийн Хамтын Ажиллагааны Санамж Бичиг”-ийг үндэслэн Монгол Улсын Иргэний нисэхийн энэхүү багц Дүрмийг боловсруулсан.

Өөрчлөлтийн түүх**Хүчин төгөлдөр огноо**

Анхны боловсруулалт

2001 оны 06 сарын 01

Нэмэлт, өөрчлөлт 1

2009 оны 09 сарын 16

Нэмэлт, өөрчлөлт 2

2010 оны 05 сарын 07

Нэмэлт, өөрчлөлт 3 (Шинэчлэлт)

2018 оны ... сарын ...

Тэмдэглэл: ИНД-47-ийн шинэчлэлтийг англи болон монгол хэл дээр, NZ Part 47 A.5-д үндэслэн боловсруулсан болно.

Гарчиг

А Бүлэг — Ерөнхий зүйл.....	5
47.1. Зорилго	5
47.3. Нөөц	5
В Бүлэг — Агаарын хөлгийн бүртгэл болон бүртгэлийн гэрчилгээ	5
47.51. Агаарын хөлгийн бүртгэл болон гэрчилгээний шаардлага.....	5
47.53. Бүртгүүлэх болон гэрчилгээ эзэмших хүсэлт	6
47.55. Бүртгэл болон гэрчилгээ олгох.....	6
47.57. Агаарын хөлгийн эзэмшил солигдох.....	8
47.59. Гэрчилгээний хугацаа дууссаны дараах агаарын хөлгийн үйл ажиллагаа ..	9
47.61. Гэрчилгээний мэдээллийн хүчинтэй байдал	9
47.63. Гэрчилгээг солих	9
47.65. Гэрчилгээний хугацаа	10
47.67. Агаарын хөлөг эвдрэх, алдагдах, хулгайлагдах, ашиглалтаас хасагдах, эсхүл гадаадад бүртгүүлэх	10
47.69. Бүртгэлийг цуцлах.....	10
47.71. Агаарын хөлгийн үндэсний харъяалал	11
С Бүлэг — Агаарын хөлгийн тэмдэглэгээ	12
47.101. Агаарын хөлгийн тэмдэглэгээний шаардлага	12
47.102. Цагдаагийн таних тэмдэг	12
47.103. Үндэсний харъяалал болон бүртгэлийн тэмдэг	13
47.104. Танигдахуйц будган зураглал болон тэмдэглэгээний зөвшөөрөл	13
47.105. Танигдахуйц будган зураглал болон тэмдэглэгээний бүртгэл	14
47.106. Танигдахуйц будган зураглал болон тэмдэглэгээг өөрчлөх.....	14
47.107. Бүртгэлийн дугаар нөөцлөх.....	14
47.108. Бүртгэлийн дугаар өөрчлөх	14
47.109. Таних тэмдгийг байрлуулах.....	15
47.111. Таних тэмдгийн байрлал- Агаараас хөнгөн агаарын хөлөг	15
47.113. Таних тэмдгийн байрлал - Агаараас хүнд агаарын хөлөг	16
47.115. Таних тэмдгийн тодорхойлолт	17
47.117. Таних тэмдгийн хэмжилт.....	17
47.119. Таних пайз	17
47.121. Таних тэмдгийг далдлах	17

А Бүлэг — Ерөнхий зүйл

47.1. Зорилго

Энэ Дүрэм нь дараах шаардлагыг тогтооно:

- (1) агаарын хөлгийг Монгол Улсад бүртгэх;
- (2) Монгол Улсад бүртгэгдсэн агаарын хөлөгт үндэсний харъяаллын тэмдэг болон бүртгэлийн дугаар олгох;
- (3) Монгол Улсад бүртгэгдсэн агаарын хөлөгт таних тэмдэг байрлуулах.

47.3. Нөөц

В Бүлэг — Агаарын хөлгийн бүртгэл болон бүртгэлийн гэрчилгээ

47.51. Агаарын хөлгийн бүртгэл болон гэрчилгээний шаардлага

(а) Энэ зүйлийн (b)-д зааснаас бусад тохиолдолд, агаарын хөлгийг 28 хоног, эсхүл түүнээс дээш хугацаагаар хууль ёсоор эзэмшиж буй этгээд нь, хэрэв тухайн агаарын хөлөг нь Монгол Улс руу, Монгол Улсаас, Монгол Улсын нутаг дэвсгэрт, эсхүл Монгол Улсын нутаг дэвсгэр дээгүүр нисэх бол, тухайн агаарын хөлгийг бүртгүүлж, дараах хүчинтэй бүртгэлийн гэрчилгээ эзэмших үүрэгтэй:

- (1) Даргын олгосон; эсхүл
- (2) ICAO-ийн Хэлэлцэн тохирогч улсын зохих нисэхийн эрх бүхий байгууллагын олгосон; эсхүл
- (3) Монгол Улсын Засгийн газартай, эсхүл ИНЕГ-тай, бүртгэлийг харилцан хүлээн зөвшөөрөх талаар байгуулсан гэрээний оролцогч тал болох бусад улсын зохих нисэхийн эрх бүхий байгууллагын олгосон.

(b) Энэ зүйлийн (а) хэсэг нь дараах заалтад хамаарахгүй:

- (1) ИНД-148-ийн дагуу гэрчилгээжсэн агаарын хөлөг үйлдвэрлэх байгууллагын шинээр үйлдвэрлэсэн, туршилтын нислэг хийх зорилгоор ИНД-21-ийн дагуу тусгай нислэгийн зөвшөөрөл олгогдсон агаарын хөлөгт; эсхүл
- (2) ИНД-101, 105, эсхүл 106-ийн дагуу агаарын хөлөг, эсхүл тоног төхөөрөмжөөр үйл ажиллагаа явуулж буй этгээдэд; эсхүл
- (3) энэ Дүрмийн хэрэгжилтийг үйл ажиллагааны нөхцөлөөр шаардсанаас бусад тохиолдолд, хууль болон ИНД-102-ийн дагуу олгосон хүнгүй агаарын хөлгөөр үйл ажиллагаа эрхлэгчийн гэрчилгээний эрхийн хүрээнд, хүнгүй агаарын хөлгөөр үйл ажиллагаа эрхэлж буй этгээдэд.

(c) Хэрэв бусад улсад бүртгэгдсэн бол, тухайн агаарын хөлгийг Монгол Улсад бүртгэхгүй байж болно.

47.53. Бүртгүүлэх болон гэрчилгээ эзэмших хүсэлт

(a) Агаарын хөлгийг бүртгүүлэх болон Монгол Улсын бүртгэлийн гэрчилгээ эзэмших хүсэлтийг дараах этгээд, эсхүл түүний нэрийн өмнөөс гаргасан байх үүрэгтэй:

- (1) тухайн агаарын хөлгийг 28 хоног, эсхүл түүнээс дээш хугацаанд хууль ёсоор эзэмшиж буй этгээд; эсхүл
- (2) тухайн хүсэлтэд заасан өдөр, тухайн агаарын хөлгийг 28 хоног, эсхүл түүнээс дээш хугацаанд хууль ёсоор эзэмших эрхтэй болох этгээд.

(b) Хүсэлт гаргагч нь дараах мэдээллийг шаардсан САА 24047/01 маягтыг бөглөж:

- (1) тухайн агаарын хөлгийн үйлдвэрлэгч, загвар болон серийн дугаар;
- (2) энэ зүйлийн (a)(1), эсхүл (2)-т заасан тухайн этгээдийн нэр болон Монгол Улсад ажил үүрэг гүйцэтгэх хаяг;
- (3) тухайн агаарын хөлөг болон энэ зүйлийн (a)(1), эсхүл (2)-т заасан тухайн этгээдтэй холбоотой Даргын шаардаж болох, маягтад заасан бусад нэмэлт мэдээлэл,

болон хуулийн дагуу, дүрэмд заасан зохих төлбөрийн баримтын хамт Даргад ирүүлэх үүрэгтэй.

(c) Дарга тодорхой нөхцөлд, тухайн хүсэлт гаргагч, эсхүл түүний нэрийн өмнөөс хүсэлт гаргагч этгээдээс дараах баримтыг бүгдийг, эсхүл аль нэгийг нь гаргаж өгөхийг шаардаж болно:

- (1) тухайн агаарын хөлгийн үйлдвэрлэгч, загвар болон серийн дугаарыг нотлох баримт;
- (2) энэ зүйлийн (a)(1), эсхүл (2)-т заасан тухайн этгээдийн биеийн байцаалтыг нотлох баримт;
- (3) энэ зүйлийн (a)(1), эсхүл (2)-т заасан этгээд тухайн агаарын хөлгийг 28 хоног, эсхүл түүнээс дээш хугацаанд хууль ёсоор эзэмшиж байгаа, эсхүл тухайн хүсэлтэд заасан өдөр эзэмших эрхтэй болох тухай албан ёсны мэдүүлэг.

(d) Агаарын хөлгийг энэ дүрмийн дагуу бүртгүүлэх хүсэлт гаргагч нь Монгол Улсын бүртгэлийн гэрчилгээ авах агаарын хөлгийн хувьд, ИНД-21-ийн дагуу тусгай категорийн–үзүүлбэрийн нислэгт тэнцэх чадвар (цаашид НТЧ гэх)-ын гэрчилгээтэй, эсхүл тусгай категорийн–хязгаарлагдмал НТЧ-ын гэрчилгээтэй, эсхүл эдгээр гэрчилгээ олгогдох бол, 47.55(d)-д шаардсан үйл ажиллагаа эрхлэгчийн мэдэгдлийн дэлгэрэнгүйг Даргад ирүүлэх үүрэгтэй.

47.55. Бүртгэл болон гэрчилгээ олгох

(a) Энэ зүйлийн (c)-г харгалзан, хэрэв Дарга дараах шаардлагыг хангасан гэж үзвэл, хүсэлт гаргагч нь агаарын хөлгөө бүртгүүлж, Монгол Улсын бүртгэлийн гэрчилгээ авах эрхтэй:

- (1) Иргэний нисэхийн тухай хуулийн дагуу, тухайн агаарын хөлөг нь өөр улсад бүртгэгдээгүй байх;

- (2) тухайн хүсэлт гаргагч нь 47.53(b)-ийн холбогдох шаардлагыг хангасан байх;
- (3) 47.53(c)-ийн дагуу шаардсан нотлох баримт болон албан ёсны мэдүүлэг нь хүлээн зөвшөөрөхүйц байх;
- (4) тухайн агаарын хөлгийг 28 хоног, эсхүл түүнээс дээш хугацаанд хууль ёсоор эзэмших этгээд нь тохирох зөв хүн байх;
- (5) хэрэв агаарын хөлөг нь ИНД-21-ийн дагуу тусгай категорийн–үзүүлбэрийн НТЧ-ын гэрчилгээтэй, эсхүл тусгай категорийн–хязгаарлагдмал НТЧ-ын гэрчилгээтэй, эсхүл эдгээр гэрчилгээ олгогдох бол энэ зүйлийн (d)-д шаардсан мэдээлэл нь хүлээн зөвшөөрөхүйц байх;
- (6) тухайн гэрчилгээг олгох нь нисэхийн аюулгүй байдлын ашиг сонирхолд харшлахгүй байх.

(b) Хэрэв Дарга шаардлага хангасан гэж үзвэл, энэ зүйлийн (a)-д заасны дагуу бүртгэлийн гэрчилгээ олгож, Эрх бүхий байгууллага нь Монгол Улсын Агаарын Хөлгийн Бүртгэлийн системд дараах мэдээллийг оруулах үүрэгтэй:

- (1) тухайн бүртгэсэн огноо;
- (2) тухайн хүсэлтэд заасан агаарын хөлгийн тодорхойлолт;
- (3) тухайн агаарын хөлгийг 28 хоног, эсхүл түүнээс дээш хугацаанд хууль ёсоор эзэмших этгээдийн нэр болон ажил үүрэг гүйцэтгэх хаяг;
- (4) 47.103-ын дагуу, Даргын тухайн агаарын хөлөгт олгосон бүртгэлийн дугаар;
- (5) хэрэв хамааралтай бол, 47.104-ийн дагуу зөвшөөрсөн танигдахуйц будган зураглал болон тэмдэглэгээний тодорхойлолт.

(c) ИНД-21-ийн дагуу тусгай категорийн–үзүүлбэрийн НТЧ-ын гэрчилгээтэй, эсхүл тусгай категорийн–хязгаарлагдмал НТЧ-ын гэрчилгээтэй, эсхүл эдгээр гэрчилгээ олгогдох агаарын хөлгийн хувьд, энэ зүйлийн (a)-ийн дагуу олгосон бүртгэлийн гэрчилгээнд энэ зүйлийн (d)-д заасан үйл ажиллагаа эрхлэгчийн мэдэгдэл дагалдсан байх ёстой.

(d) Тухайн үйл ажиллагаа эрхлэгчийн мэдэгдэл нь дараах мэдээллийг агуулсан байх ёстой:

- (1) тухайн агаарын хөлгийн хийц, загвар болон бүртгэлийн тэмдэглэгээ;
- (2) дараах этгээдийн нэр:
 - (i) тухайн агаарын хөлгийн бүртгэлийн гэрчилгээ эзэмшигчийг төлөөлж буй этгээд;
 - (ii) тухайн агаарын хөлгийн нислэгийн үйл ажиллагааг удирдаж байгаа болон багийн гишүүдийн сургалт хариуцсан этгээд;
 - (iii) тухайн агаарын хөлгийн техник үйлчилгээг удирдах хариуцлага бүхий этгээд;
- (3) минимум түлшний нөөцтэй хэвийн аяллын хурдаар максимум нисэх хугацааг багтаасан, ИХНД / VFR-ийн дагуу тухайн агаарын хөлгийн аюулгүй үйл ажиллагаанд шаардлагатай минимум нөөц түлшний дэлгэрэнгүй;

- (4) тухайн агаарын хөлгийн техник үйлчилгээний үндсэн гүйцэтгэгчийн нэр;
- (5) ИНД-91.605 (b)(2)-оор шаардсан техник үйлчилгээний хөтөлбөрийн таних тодорхойлолт;
- (6) тухайн агаарын хөлгөөр, ажиллагаагүй тоног төхөөрөмжтэйгээр үйл ажиллагаа явуулах журмын дэлгэрэнгүй;
- (7) тухайн агаарын хөлгөөр явгалалт үйлдэх этгээдэд тавигдах аливаа хязгаарлалт, эсхүл ур чадварын дэлгэрэнгүй;
- (8) хэрэв хамааралтай бол, тухайн агаарын хөлгөөр зорчигч тээвэрлэхтэй холбоотой аливаа хязгаарлалтын дэлгэрэнгүй;
- (9) дараах мэдээллийг агуулсан, агаарын хөлөгт суурилагдсан харвах суудал, гарцны тэсрэх төхөөрөмж, эсхүл jettison системийн талаарх мэдээллүүд:
 - (i) суурилуулсан тоног төхөөрөмжийн дэлгэрэнгүй;
 - (ii) нислэгийн үед ашиглах журам;
 - (iii) агаарын хөлөгт техник үйлчилгээ хийдэг, эсхүл бусад байдлаар харьцдаг этгээдийн сургалтын журам болон, суурилуулсан харвах суудал, гарцны тэсрэх төхөөрөмж, эсхүл jettison систем дээр ажиллах аюулгүй байдлын дадлага туршлага;
 - (iv) аливаа харвах суудал, гарцны тэсрэх төхөөрөмж, эсхүл jettison системд зориулсан нөөц тэслэгч зэрэг хадгалагдаж буй тоног төхөөрөмжийн хяналтыг багтаасан газарт мөрдөх аюулгүй байдлын арга хэмжээ;
 - (v) ИНД-66–ийн дагуу олгогдсон техник үйлчилгээний эрхийн гэрчилгээ (MAC) эзэмшдэг бөгөөд суурилуулсан харвах суудал, гарцны тэсрэх төхөөрөмж, эсхүл jettison системд техник үйлчилгээ хийхээр бүртгэлийн гэрчилгээ эзэмшигчийн зөвшөөрсөн этгээдийн нэр;
 - (vi) суурилуулсан аливаа харвах суудал, гарцны тэсрэх төхөөрөмж, эсхүл jettison систем дээр сургалт зохион байгуулах хариуцлага бүхий этгээдийн нэр;
 - (vii) суурилуулсан харвах суудал, гарцны тэсрэх төхөөрөмж, эсхүл jettison систем байгаа болохыг, мөн шаардлагатай аюулгүй байдлын урьдчилсан анхааруулгын талаар орон нутгийн онцгой байдлын үйлчилгээний нэгжид мэдээлэх хариуцлага бүхий этгээдийн нэр.

47.57. Агаарын хөлгийн эзэмшил солигдох

(a) Хэрэв, Монгол Улсын бүртгэлийн гэрчилгээ эзэмшигч нь тухайн бүртгэгдсэн агаарын хөлгийг хууль ёсоор эзэмшихээ 28 хоног, эсхүл түүнээс дээш хугацаагаар зогсоовол, тухайн гэрчилгээ нь, гэрчилгээ эзэмшигч тухайн агаарын хөлгийг хууль ёсоор эзэмшихээ зогсоосон өдрөөс эхлэн хүчингүй болно.

(b) Энэ зүйлийн (a)-ийн дагуу гэрчилгээ нь хүчингүй болсон гэрчилгээ эзэмшигч нь дараах үүрэгтэй:

- (1) хүчингүй болсон өдрөөс хойш 14 хоногийн дотор:

(i) Монгол Улсын бүртгэлийн гэрчилгээний ар талын хэвлэмэл маягтыг; эсхүл

(ii) САА24047/03 маягтыг бүрэн гүйцэд бөглөж,

хуулийн дагуу, дүрэмд заасан зохих төлбөрийн баримтын хамт Даргад ирүүлэх; эсхүл

(2) хамааралтай бол, 47.67(b)-ийн дагуу Даргад мэдэгдэх.

47.59. Гэрчилгээний хугацаа дууссаны дараах агаарын хөлгийн үйл ажиллагаа

(a) 47,51(a)-г үл харгалзан, Монгол Улс руу, Монгол Улсаас, Монгол Улсын нутаг дэвсгэрт, эсхүл Монгол Улсын нутаг дэвсгэр дээгүүр нислэг үйлдэж буй агаарын хөлгийг хууль ёсоор эзэмших эрхтэй этгээдийг 47.57(a)-гийн дагуу гэрчилгээний хугацаа дууссанаас хойш 28 хоногийн дотор Монгол Улсын хүчинтэй бүртгэлийн гэрчилгээтэй байхыг шаардахгүй.

(b) 47.57(a)-гийн дагуу Монгол Улсын бүртгэлийн гэрчилгээний хугацаа дууссанаас 28 хоногийн дараа, Дарга тухайн агаарын хөлөгт бүртгэлийн гэрчилгээ олгох хүртэл тухайн агаарын хөлгөөр үйл ажиллагаа эрхлэхийг хориглоно.

47.61. Гэрчилгээний мэдээллийн хүчинтэй байдал

(a) Монгол Улсын бүртгэлийн гэрчилгээ эзэмшигч нь бүртгэлийн гэрчилгээнд тусгагдсан дараах мэдээллийн хүчинтэй байдалд нөлөөлөх аливаа өөрчлөлтийг Даргад нэн даруй мэдэгдэнэ:

(1) тухайн гэрчилгээнд агуулагдсан аливаа мэдээлэл; эсхүл

(2) 47.55(c)-д шаардсан үйл ажиллагаа эрхлэгчийн мэдэгдэлд агуулагдсан аливаа мэдээлэл.

(b) Хэрэв энэ зүйлийн (a)(1)-ийн дагуу мэдэгдэл хүлээн авсны дараа Дарга хуулийн дагуу бүртгэлийн гэрчилгээнд нэмэлт өөрчлөлт оруулах, эсхүл хүчингүй болгон, түүний оронд шинэ гэрчилгээ олгох бол, Эрх бүхий байгууллага нь Монгол Улсын Агаарын хөлгийн бүртгэлийн системд холбогдох мэдээллийг шинэчлэх үүрэгтэй.

(c) Хэрэв энэ зүйлийн (a)(2)-ын дагуу мэдэгдсэн өөрчлөлт нь Даргын хүлээн зөвшөөрөхүйц бол, Дарга 47.55(c)-д шаардсан, тухайн үйл ажиллагаа эрхлэгчийн мэдэгдэлд агуулагдсан мэдээлэлд нэмэлт оруулж болно.

(d) Хэрэв Дарга тухайн өөрчлөлт нь нисэхийн аюулгүй байдлын ашиг сонирхолд шаардлагатай гэж үзвэл, 47.55(c)-д шаардсан үйл ажиллагаа эрхлэгчийн мэдэгдэлд агуулагдсан мэдээлэлд өөрчлөлт оруулж болно.

47.63. Гэрчилгээг солих

(a) Монгол Улсын бүртгэлийн гэрчилгээ эзэмшигч нь дараах тохиолдолд гэрчилгээ солиулах хүсэлт гаргаж болно, хэрэв тухайн гэрчилгээ нь:

(1) гээгдсэн, алдагдсан, эсхүл устсан; эсхүл

(2) мэдээлэл нь цаашид гаргацтай уншигдахгүйгээр гэмтсэн.

(b) Гэрчилгээ солиулах хүсэлт гаргагч нь САА 24047/01 маягтыг бөглөж, дараах баримтын хамт Даргад хүргүүлэх үүрэгтэй:

- (1) хуулийн дагуу, дүрэмд заасан зохих төлбөрийн баримт;
- (2) хамааралтай бол, тухайн гэмтэлтэй гэрчилгээ.

47.65. Гэрчилгээний хугацаа

(a) Монгол Улсын бүртгэлийн гэрчилгээ нь:

- (1) 47.57(a)-ийн дагуу хүчингүй болсон; эсхүл
- (2) Дарга гэрчилгээг түдгэлзүүлэх, эсхүл хүчингүй болгох хүртэл хүчинтэй байна.

(b) Монгол Улсын бүртгэлийн түдгэлзүүлэгдсэн гэрчилгээ эзэмшигч нь зохих тэмдэглэл хийлгэхээр тухайн гэрчилгээг Даргад нэн даруй хүргүүлэх үүрэгтэй.

(c) Монгол Улсын бүртгэлийн хүчингүй болсон гэрчилгээ эзэмшигч нь тухайн гэрчилгээг Даргад нэн даруй хураалгах үүрэгтэй.

(d) ИНД-21-ийн дагуу олгогдсон тусгай категорийн–үзүүлбэрийн НТЧ-ын гэрчилгээ, эсхүл тусгай категорийн–хязгаарлагдмал НТЧ-ын гэрчилгээ бүхий агаарын хөлөгт 47.55(c)-д шаардсан үйл ажиллагаа эрхлэгчийн мэдэгдэл нь зөвхөн энэ зүйлийн (a)-ийн дагуу тухайн агаарын хөлгийн бүртгэлийн гэрчилгээний хүчинтэй байх хугацаанд хүчинтэй байна.

47.67. Агаарын хөлөг эвдрэх, алдагдах, хулгайлагдах, ашиглалтаас хасагдах, эсхүл гадаадад бүртгүүлэх

(a) Монгол Улсын бүртгэлийн гэрчилгээ эзэмшигч нь дараах тохиолдолд энэ зүйлийн (b)-ийн дагуу Даргад мэдэгдэх үүрэгтэй:

- (1) тухайн агаарын хөлөг дараах нөхцөл байдалд орсныг мэдсэнээс хойш 14 хоногийн дотор:
 - (i) эвдэрсэн, алдагдсан, эсхүл хулгайлагдсан; эсхүл
 - (ii) ашиглалтаас бүрмөсөн хасагдсан; эсхүл

(2) тухайн агаарын хөлгийг өөр улсын агаарын хөлгийн бүртгэлд бүртгүүлэх хүсэлт гаргасны дараа, яаралтай мэдэгдэх;

(b) Энэ зүйлийн (a)-ийн дагуу гаргах мэдэгдэл нь шаардлагыг хангасан байх ёстой:

- (1) бичгээр үйлдсэн байх;
- (2) тухайн гэрчилгээ эзэмшигч гарын үсэг зурсан байх;
- (3) тухайн болсон нөхцөл байдлыг тодорхойлсон байх;
- (4) тухайн бүртгэлийн гэрчилгээг хавсаргасан байх.

47.69. Бүртгэлийг цуцлах

(a) Дараах нөхцөл үүсэх хүртэл агаарын хөлөг бүртгэгдсэн хэвээр байна:

(1) бүртгэлийн гэрчилгээ эзэмшигч нь тухайн агаарын хөлгийн гэрчилгээг хүчингүй болгох хүсэлтийг Даргад гаргаснаар Дарга гэрчилгээг хүчингүй болгох хүртэл, эсхүл

(2) Дарга:

(i) тухайн агаарын хөлөг эвдэрсэн, алдагдсан, эсхүл хулгайлагдсаныг; эсхүл

(ii) тухайн агаарын хөлгийг ашиглалтаас бүрмөсөн хассаныг; эсхүл

(iii) тухайн агаарын хөлгийг 28 хоног, эсхүл түүнээс дээш хугацаагаар хууль ёсоор эзэмшиж буй этгээд нь агаарын хөлгөө өөр улсад бүртгүүлэх хүсэлт гаргасныг; эсхүл

(iv) тухайн агаарын хөлөг Монгол Улсаас өөр улсад бүртгэгдсэнийг, нотлох баримт хангалттай гэж үзэн, тухайн бүртгэлийн гэрчилгээг хүчингүй болгох хүртэл, эсхүл

(3) Дарга, хуулийн дагуу тухайн бүртгэлийн гэрчилгээг өөр байдлаар хүчингүй болгох хүртэл, эсхүл

(4) Дарга:

(i) 47.57(а)-д заасны дагуу бүртгэлийн гэрчилгээний хугацаа дууссаныг тогтоосон бол;

(ii) Дарга, тухайн гэрчилгээний хугацаа дууссаныг тогтоосноос хойш 14 хоногийн дотор 47.53-ын дагуу хүсэлт хүлээж аваагүй бол.

(b) Эрх бүхий байгууллага, Монгол Улсын Агаарын Хөлгийн Бүртгэлийн системд тухайн агаарын хөлгийг оруулахыг дараах тохиолдолд зогсоох үүрэгтэй, хэрэв Дарга:

(1) (а)(1), (2), эсхүл (3)-д заасны дагуу тухайн агаарын хөлгийн бүртгэлийн гэрчилгээнд эргэлзэж байвал; эсхүл

(2) энэ зүйлийн (а)(4)-д заасан тухайн асуудал тогтоогдвол.

(c) Энэ зүйлийн (а)(1)-г үл харгалзан, хэрэв Эрх бүхий байгууллага нь тухайн агаарын хөлгийг бүртгэлээс буцалтгүй хасуулах болон экспортын зөвшөөрлийн хүсэлт хүргүүлснийг бүртгэсэн бол, бүртгэлийн гэрчилгээ эзэмшигч нь тухайн агаарын хөлгийн бүртгэлийн гэрчилгээг хүчингүй болгох хүсэлтийг Даргад гаргахгүй байж болно.

47.71. Агаарын хөлгийн үндэсний харъяалал

47.55-ын (а)-ийн дагуу Даргын бүртгэсэн агаарын хөлөг нь Монгол Улсын үндэсний харъяалалтай байна.

С Бүлэг — Агаарын хөлгийн тэмдэглэгээ

47.101. Агаарын хөлгийн тэмдэглэгээний шаардлага

(a) Энэ зүйлийн (b), (c) (d) болон (e)-д зааснаас бусад тохиолдолд, Монгол Улсын бүртгэлийн гэрчилгээ эзэмшигч нь тухайн гэрчилгээнд холбогдох агаарын хөлөгт дараах шаардлагыг бататгах үүрэгтэй:

- (1) 47.103-ын дагуу олгосон бүртгэлийн дугаар болон 47.109– 47.117-ийн дагуу үндэсний харъяаллын тэмдэг байрлуулсныг;
- (2) 47.119-ийн шаардлагын дагуу таних пайз байрлуулсныг;

(b) Монгол Улсад үйл ажиллагаа явуулж буй, Монгол Улсад бүртгэгдсэн дараах маягийн агаарын хөлөгт үндэсний харъяаллын тэмдэг байрлуулахыг шаардахгүй:

- (1) хөөрөлтийн гэрчилгээжсэн дээд жин нь 2270 кг, эсхүл түүнээс доош онгоц;
- (2) роторт-хөлөг;
- (3) глайдер болон мото-глайдер;
- (4) хүнтэй бөмбөлөг;
- (5) ИНД-21-ийн Н Бүлгийн дагуу олгосон тусгай категорийн НТЧ-ын гэрчилгээний хүрээнд үйл ажиллагаа явуулж буй онгоц.

(c) хамааралгүй

(d) Монгол Улсад, Цагдаагийн байгууллагын Даргын зөвшөөрлөөр цагдаагийн үйл ажиллагаа явуулж буй Монгол Улсад бүртгэгдсэн агаарын хөлөгт 47.102-ын дагуу олгосон цагдаагийн таних тэмдэг байрлуулсан бол 47.103-ын дагуу олгосон үндэсний харъяаллын тэмдэг, эсхүл бүртгэлийн дугаарыг байрлуулахгүй байж болно.

(e) Хэрэв тухайн агаарын хөлөгт 47.104-ийн дагуу зөвшөөрсөн танигдахуйц будган зураглал болон тэмдэглэгээг байрлуулсан бол, Монгол Улсад үйл ажиллагаа явуулж буй, Монгол Улсад бүртгэгдсэн агаарын хөлөгт 47.103-ын дагуу олгосон үндэсний харъяаллын тэмдэг, эсхүл бүртгэлийн дугаар байрлуулахыг шаардахгүй.

(f) Энэ зүйлийн (e)-ийн дагуу зөвшөөрөгдсөн танигдахуйц будган зураглал болон тэмдэглэгээг байрлуулсан агаарын хөлгийн бүртгэлийн гэрчилгээ эзэмшигч нь 47.109-д заасны дагуу будган зураглал болон тэмдэглэгээг тухайн агаарын хөлөгт үргэлжлүүлэн байрлуулж байгааг бататгах үүрэгтэй.

47.102. Цагдаагийн таних тэмдэг

Монгол Улсад бүртгэгдсэн агаарын хөлөгт байрлуулах цагдаагийн таних тэмдэг нь дараах тэмдэглэгээнээс бүрдсэн байх ёстой:

- (1) **POLICE** гэсэн үгний ард Цагдаагийн байгууллагын Даргын олгосон дугаар байх;
- (2) Цагдаагийн байгууллагын Дарга олгоход зориулан Даргын нөөцөлсөн бүртгэлийн дугаар.

47.103. Үндэсний харъяалал болон бүртгэлийн тэмдэг

- (a) Монгол Улсад бүртгэгдсэн агаарын хөлгийн үндэсний харъяаллын тэмдэг нь “JU” гэсэн том үсэг байх ёстой.
- (b) Монгол Улсад бүртгэгдсэн агаарын хөлгийн бүртгэлийн дугаар нь:
- (1) тухайн агаарын хөлөгт Даргаар олгогдсон байх;
 - (2) дөрвөн тооноос бүрдэх ба үндэсний харъяаллын тэмдгийн ард байрлаж, хөндлөн зураасаар тусгаарлагдсан байх ёстой.

47.104. Танигдахуйц будган зураглал болон тэмдэглэгээний зөвшөөрөл

- (a) ИНД-21-ийн Н Бүлгийн дагуу тусгай категорийн НТЧ-ын гэрчилгээ олгогдсон агаарын хөлгийн бүртгэлийн гэрчилгээ эзэмшигч нь, 47.103-ын дагуу олгосон үндэсний харъяалал болон бүртгэлийн дугаарын оронд, танигдахуйц будган зураглал болон тэмдэглэгээг тухайн агаарын хөлөгт байрлуулах зөвшөөрлийг Даргаас хүсэж болно.
- (b) ИНД-21-ийн Н Бүлгийн дагуу олгосон стандарт, эсхүл хязгаарлагдмал категорийн НТЧ-ын гэрчилгээ олгогдсон агаарын хөлөг, эсхүл микролайт агаарын хөлгийн бүртгэлийн гэрчилгээ эзэмшигч нь 47.103-ын дагуу олгосон үндэсний харъяалал болон бүртгэлийн дугаарын оронд, түүхэн шалтгаанаар өөр танигдахуйц будган зураглал болон тэмдэглэгээг тухайн агаарын хөлөгт байрлуулах зөвшөөрлийг Даргаас хүсэж болно.
- (c) Танигдахуйц будган зураглал болон тэмдэглэгээний зөвшөөрөл авах хүсэлт гаргагч нь дараах мэдээллийг шаардсан САА 24047/04 маягтыг бөглөж:
- (1) тухайн агаарын хөлөгт Даргаас олгосон үндэсний харъяалал болон бүртгэлийн дугаар;
 - (2) санал болгож буй тухайн агаарын хөлгийн танигдахуйц будган зураглал болон тэмдэглэгээний бичгэн тодорхойлолт;
 - (3) санал болгож буй тухайн агаарын хөлгийн танигдахуйц будган зураглал болон тэмдэглэгээг өнгөт зураг, фото зураг, гар зураг, эсхүл ижил хэлбэрээр үнэн зөв харуулсан гурван-талт зураг;
 - (4) Даргын шаардаж болох, эсхүл маягад тусгасан тухайн агаарын хөлөг, эсхүл бүртгэлийн гэрчилгээ эзэмшигчтэй холбоотой нэмэлт мэдээллийг,

хуулийн дагуу, дүрэмд заасан зохих төлбөрийн баримтын хамт Даргад ирүүлэх үүрэгтэй.

(d) Хэрэв будган зураглал болон тэмдэглэгээ нь тухайн агаарын хөлгийг ижил, эсхүл төсөөтэй маяг болон загварын бусад агаарын хөлгөөс ялгахад хангалттай гэж үзвэл, Дарга энэ зүйлийн (a)-ийн дагуу хүсэлт гаргасан, тухайн танигдахуйц будган зураглал болон тэмдэглэгээг зөвшөөрч болно.

(e) Хэрэв будган зураглал болон тэмдэглэгээ нь түүхэн, эсхүл бусад тусгай шалтгаантай тохирч байгаа бөгөөд тухайн агаарын хөлгийг ижил, эсхүл төсөөтэй маяг болон загварын бусад агаарын хөлгөөс ялгахад хангалттай гэж үзвэл, Дарга энэ

зүйлийн (b)-ийн дагуу хүсэлт гаргасан, тухайн танигдахуйц будган зураглал болон тэмдэглэгээг зөвшөөрч болно.

(f) Зураг, эсхүл гар зураг дээр үндэслэн, энэ зүйлийн (d), эсхүл (e)-ийн дагуу зөвшөөрсөн танигдахуйц будган зураглал болон тэмдэглэгээтэй агаарын хөлгийн бүртгэлийн гэрчилгээ эзэмшигч нь, тухайн зөвшөөрсөн танигдахуйц будган зураглал болон тэмдэглэгээг байрлуулсан тухайн агаарын хөлгийн гурван-талт фото зургийг Даргад ирүүлэх үүрэгтэй.

47.105. Танигдахуйц будган зураглал болон тэмдэглэгээний бүртгэл

(a) 47.104-ийн дагуу зөвшөөрсөн танигдахуйц будган зураглал болон тэмдэглэгээг 47.55-ын (b)-ийн дагуу Монгол Улсын Агаарын Хөлгийн Бүртгэлийн системд оруулах ёстой.

47.106. Танигдахуйц будган зураглал болон тэмдэглэгээг өөрчлөх

(a) Тухайн будган зураглал, эсхүл тэмдэглэгээг өөрчлөхөөр зорьж буй, 47.104-ийн дагуу зөвшөөрсөн танигдахуйц будган зураглал болон тэмдэглэгээ байршуулсан агаарын хөлгийн бүртгэлийн гэрчилгээ эзэмшигч нь 47.104-ийн дагуу шинэ будган зураглал болон тэмдэглэгээний зөвшөөрлийн хүсэлтийг Даргад гаргах үүрэгтэй.

(b) Тухайн будган зураглал, эсхүл тэмдэглэгээг хэрэглэхээ зогсоохоор зорьж буй, 47.104-ийн дагуу зөвшөөрсөн танигдахуйц будган зураглал болон тэмдэглэгээ байршуулсан агаарын хөлгийн бүртгэлийн гэрчилгээ эзэмшигч нь дараах үүрэгтэй:

- (1) энэ тухай Даргад бичгээр мэдэгдэх;
- (2) тухайн агаарын хөлөгт 47.101-ийн дагуу таних тэмдэг байрлуулах.

47.107. Бүртгэлийн дугаар нөөцлөх

(a) Агаарын хөлгөө Монгол Улсын агаарын хөлгийн бүртгэлд бүртгүүлэхээр зорьж буй этгээд нь бүртгэлийн дугаар нөөцлүүлэх хүсэлтийг, хуулийн дагуу, дүрэмд заасан зохих төлбөрийн баримтын хамт Даргад ирүүлж болно.

(b) Дарга, энэ зүйлийн (a)-ийн дагуу гаргасан хүсэлтийг хүлээн авмагц, бүртгэлийн дугаарыг 24 сараас дээшгүй хугацаагаар нөөцөлж болно, хэрэв:

- (1) тухайн дугаарыг олгоогүй, эсхүл нөөцлөөгүй бол;
- (2) тухайн дугаарыг ашиглах нь тохиромжгүй гэж Дарга үзсэн бол.

(c) Энэ зүйлийн (b)-ийн дагуу нөөцөлсөн бүртгэлийн дугаарыг, нөөцлөгдсөн хугацаанд нь, нөөцлөхийг хүссэн тухайн этгээд хүсэлт гаргаснаас бусад тохиолдолд, агаарын хөлөгт олгохгүй.

47.108. Бүртгэлийн дугаар өөрчлөх

(a) Монгол Улсын бүртгэлийн гэрчилгээ эзэмшигч нь гэрчилгээнд заасан, тухайн агаарын хөлөгт олгосон бүртгэлийн дугаарыг шинэ бүртгэлийн дугаараар солих хүсэлтийг Даргад гаргаж болно.

(b) Хүсэлт гаргагч нь бүртгэлийн дугаар өөрчлөх хүсэлтийг бичгээр гарган, дараах мэдээллийг хавсарган Даргад хүргүүлэх үүрэгтэй:

- (1) тухайн бүртгэлийн гэрчилгээ;
- (2) тухайн хүсэж буй бүртгэлийн дугаар;
- (3) хуулийн дагуу, дүрэмд заасан зохих төлбөрийн баримт.

(c) Дарга, энэ зүйлийн (b)-д заасны дагуу ирүүлсэн хүсэлтийг хүлээн аваад, тухайн агаарын хөлөгт олгосон бүртгэлийн дугаарыг хураан авч, шинэ бүртгэлийн дугаар олгож болно.

(d) Энэ зүйлийн (c)-ийн дагуу шинэ бүртгэлийн дугаар олгосон тохиолдолд, Эрх бүхий байгууллага тухайн агаарын хөлөгт олгосон шинэ бүртгэлийн дугаарын мэдээллийг Монгол Улсын Агаарын Хөлгийн Бүртгэлийн системд оруулах үүрэгтэй.

47.109. Таних тэмдгийг байрлуулах

(a) 47.101-ийн дагуу байрлуулахыг шаардсан үндэсний харъяалал болон бүртгэлийн тэмдгийг, эсхүл 47.104-ийн дагуу зөвшөөрсөн, танигдахуйц будган зураглал болон тэмдэглэгээ нь дараах шаардлагыг хангасан байх ёстой:

- (1) тухайн агаарын хөлөгт будсан байх, эсхүл дүйцэх түвшний бусад тогтвортой аргаар бэхлэсэн;
- (2) тухайн агаарын хөлгийн хийц, эсхүл хэлбэрт тохируулан, хамгийн тохиромжтой хэсэгт ил харагдахуйц байрлуулсан;
- (3) байнга цэвэр, тод харагдахуйц байлгасан.

(b) Үндэсний харъяаллын үсэг болон бүртгэлийн дугаарын тоо болон холбоос зураас нь ижил өнгөтэй байх ба тэдгээрийг будсан, эсхүл бусад хэлбэрээр бэхэлсэн дэвсгэрээс тод ялгарч харагдахуйц байх ёстой.

(c) Цагдаагийн таних тэмдгийг агаарын хөлөгт бэхлэхдээ, Цагдаагийн байгууллагын Даргын зөвшөөрсөн цагдаагийн үйл ажиллагаа явуулах тухайн хугацаанд, энэ Бүлгийн бусад шаардлагын дагуу байрлуулсныг бататгах ёстой.

47.111. Таних тэмдгийн байрлал- Агаараас хөнгөн агаарын хөлөг

(a) Дирижабльд, 47.101(a)-ийн дагуу шаардсан таних тэмдгийг дараах байдлаар байрлуулах ёстой:

- (1) дирижаблийн их биений хөндлөн огтлолын хамгийн өргөн хэсгийн ойролцоо, уртын дагуу босоо гадаргууд тэгш хэмтэй; эсхүл
- (2) дараах тэнцвэржүүлэгч дээр:
 - (i) тухайн хэвтээ тэнцвэржүүлэгчийн баруун хагасын дээд гадаргууд болон зүүн хагасын доод гадаргууд, тоо болон үсгийн орой нь дайрах булан тийш чиглэсэн;
 - (ii) тухайн босоо тэнцвэржүүлэгчийн хоёр талын доод хагаст, тоо болон үсгийг босоогоор.

(b) Бөмбөрцгөн бөмбөлгийн таних тэмдгийг 47.101(a)-д шаардсаны дагуу, тухайн бөмбөлгийн тойргийн хамгийн урт хэвтээ тэнхлэгийн хэсэгт, диаметрийн эсрэг хоёр хэсэгт байрлуулах ёстой.

(c) Бөмбөрцгөн бус бөмбөлгийн таних тэмдгийг 47.101(a)-д шаардсаны дагуу, тухайн бөмбөлгийн хамгийн урт хөндлөн огтлолын шугамын ойролцоо хоёр талд, сагсыг дүүжилсэн татлага олсны бэхэлгээний дээр, эсхүл бөмбөлгийн доод бүслүүрийн яг дээр нь байрлуулах ёстой.

47.113. Таних тэмдгийн байрлал - Агаараас хүнд агаарын хөлөг

(a) Энэ зүйлийн (c) болон (d)-д зааснаас бусад тохиолдолд, онгоц, глайдер болон мото-глайдерт 47.101-ийн (a)-д шаардсан таних тэмдгийг дараах байдлаар байрлуулах ёстой:

- (1) тухайн далавчны бүтцийн доод гадаргууд бол. Хэрэв тухайн таних тэмдэг нь далавчны бүтцийн гадна үзүүрээр хязгаарлагдаж байгаа бол тэдгээрийг зүүн доод гадаргууд байрлуулах ёстой. Үсгийн орой хэсэг нь тухайн далавчны дайрах булан тийш чиглэсэн байх ёстой ба далавчны урд болон хойд ирмэгийн дунд, аль болох боломжоор нь тэнцүү зайтай байхаар;
- (2) тухайн далавч болон сүүлний гадаргуугийн хооронд, их биений хоёр талд хэвтээгээр, эсхүл сүүлний босоо гадаргуугийн дээд хагаст хэвтээгээр. Ганц босоо сүүлний гадаргуу дахь таних тэмдэг нь 2 талд байх ёстой. Олон босоо сүүлтэй гадаргуу дахь таних тэмдэг захын сүүлний гадна гадаргууд байх ёстой.

(b) Энэ зүйлийн (d)-д зааснаас бусад тохиолдолд, роторт-хөлөгт 47.101(a)(1)-ийн дагуу шаардсан таних тэмдгийг, хэвийн үйл ажиллагааны үед халхлагдахгүй, ил харагдах хэсэгт дараах байдлаар байрлуулах ёстой:

- (1) тухайн их биений, эсхүл бүхээгийн гадна доод гадаргууд;
- (2) тухайн роторт-хөлгийн хоёр талд тэгш хэмтэй.

(c) Зөвхөн Монгол Улсад үйл ажиллагаа явуулдаг онгоц, глайдер болон хөдөлгүүрт глайдерт, далавчны бүтцийн доод гадаргууд таних тэмдэг байрлуулахыг шаардахгүй.

(d) Хэрэв онгоц, глайдер, хөдөлгүүрт глайдер, эсхүл роторт-хөлөг нь:

- (1) энэ дүрмийн холбогдох заалтад дурьдсан эд ангигүй; эсхүл
- (2) энэ дүрмийн дагуу тэмдэглэх шаардлагатай гадаргуу нь 47.117-д заасан хэмжээтэй таних тэмдгийг байрлуулахад хангалттай том биш бол,

Дарга, тухайн агаарын хөлгийн өөр аль нэг хэсэгт таних тэмдэг байрлуулахыг зөвшөөрч болно, хэрэв:

- (1) тухайн таних тэмдгийг хэвийн үйл ажиллагааны үед халхлагдахгүй ил харагдах хэсэгт байрлуулсан;
- (2) тухайн таних тэмдэг нь хялбар танигдах бол.

47.115. Таних тэмдгийн тодорхойлолт

- (a) Үндэсний харъяалал болон бүртгэлийн тэмдэг нь хээ угалзгүй, латин том үсэг болон араб тооноос бүрдэх ёстой.
- (b) Тухайн үсэг, тоо бүрийн өргөн болон холбоос зураасны урт нь тухайн үсгийн өндрийн гуравны хоёртой тэнцүү байх ёстой.
- (c) Үсэг болон тоо бүр нь үсэг болон тооны өмнө, эсхүл ардаа үсгийн өндрийн дөрөвний нэгээс багагүй зайтай байх ба, зураас болон тоо нь энэ зорилгоор үсэгтэйгээ адилхан тусгаарлагдсан байх ёстой.
- (d) Тухайн үсэг, тоо болон холбоосыг бүрдүүлж буй зураас нь тухайн үсгийн өндрийн зургааны нэгтэй тэнцүү өргөнтэй үргэлжилсэн шугамаар бичигдсэн байх ёстой.

47.117. Таних тэмдгийн хэмжилт

- (a) Үндэсний харъяалал болон бүртгэлийн тэмдэг нь ижил өндөртэй үсэг болон тооноос бүрдэх ба тэдгээрийг байрлуулсан гадаргуугийн аливаа ирмэгээс 50 мм-ээс доошгүй зайд байрлуулах ёстой.
- (b) Энэ зүйлийн (c)-д зааснаас бусад тохиолдолд, агаарын хөлгийн таних тэмдгийн өндөр нь 250 мм-ээс доош байхыг хориглоно.
- (c) Дарга, агаараас хүнд агаарын хөлөгт 250 мм-ийн өндөртэй таних тэмдгийг байрлуулахад гадаргуу нь хангалттай том биш бол, 250 мм-ээс бага, гэхдээ 150 мм-ээс багагүй өндөртэй таних тэмдэг байрлуулахыг зөвшөөрч болно.

47.119. Таних пайз

- (a) 47.101 (a)-ийн дагуу байрлуулахыг шаардсан таних пайзанд үндэсний харъяалал болон бүртгэлийн тэмдгийг сийлж дүрслэх, цохиж шигтгэх, эсхүл хэвэнд цутгаж суулгасан байх ёстой.
- (b) Тухайн таних пайз нь дараах шаардлагыг хангасан байх ёстой:
- (1) физик шинж чанараараа галд тэсвэртэй металл, эсхүл галд тэсвэртэй бусад материалаар хийсэн байх;
 - (2) тухайн агаарын хөлөг рүү орох гол хаалганы ойролцоо, ил харагдах байрлалд бэхэлсэн байх.

47.121. Таних тэмдгийг далдлах

Энэ дүрмийн дагуу тухайн агаарын хөлөгт байрлуулахыг шаардсан үндэсний харъяаллын, эсхүл бүртгэлийн тэмдэг, зөвшөөрсөн танигдахуйц будган зураглал болон тэмдэглэгээ, эсхүл цагдаагийн таних тэмдгийг өөрчилсөн, эсхүл халхалсан аливаа таних тэмдэг, эсхүл билэгдлийг Монгол Улсад бүртгэгдсэн агаарын хөлөгт байрлуулахыг аливаа этгээдэд хориглоно.

--oOo--